

2 Jon

Nauəuə iətəm tatol keiu lan iətəm Jon təmətei

Nəghatiən əkuəkır rəha nauəuə u 2 Jon

?Pəh təmətei nauəuə u? Aposil Jon təmətei nauəuə u.

?Təmətei tətuvən kəm pəh? Təmətei tətuvən kəm pətan kəti rəha niməfaki. Mətəu nəmə təhro nəghatiən u “pətan,” nīpətin təni məmə niməfaki kəti. Kəni “nənətin mīn,” ilah nətəmimi rəha niməfaki. Jon təmətei nəghatiən mīn əha, təhmen e nəghatiən kəti tətəhluaig. Təsolkəikəiən məmə otəni pətīgəm nərgin mətəu-inu, kol mətə nətəmimi nəuvein kotol nolīən tərah e lah.

?Natigian təhro lanu nian təmətei? E nian əha, nəgətun mīn tepət kəutaliuək e ikīn pīsīn pīsīn mīn. Nətəmimi nətəm kəmotətəu nəghatiən rəhalah kīnotəfən nauəniən kəm lah. Kəni motəfən ikīn mīn rəha napīliən, kəni mətətasīru e lah. Mətəu nəgətun eiūə mīn kəutəhuvən əpnəpīn mīn o niuvi rəkīsīən nətəmimi rəha niməfaki məmə okotəpəh nəghatiən pəhriən.

?Təmətei nauəuə u o nak? Nian nəgətun eiūə mīn kəutəhuva, Jon təni məmə nətəmimi nətəm kəutəhatətə e nəghatiən pəhriən rəha Uhgīn, okotəkəikəi motəhtīpəsīg e nəgətun eiūə mīn əha, kəni motəpəh nolīən mīne nəgətuniən rəhalah, kəni məsotasīruīən e lah. Mətəu Jon tolkəikəi

məmə nətəmimi rəha niməfaki okotəkeikei motolkeikei nətəmimi pəhriən rəha niməfaki. Inu nəlpəkauian rəha Uhgīn.

Nətuəuinian

¹ Nauəuə u rəha eldə tatuvən kəm pətan Uhgīn təmitəpīn* mine nenətin mīn. Nipəhriəniən məmə iəkolkeikei pik itəmah. Mətəu səniəmə iəu pisin əmə iəkolkeikei itəmah, mətəu nətəmimi mīn rəfin u nətəm kotəhrun mīn nipəhriəniən,† kotalkeikei itəmah. ² Kəni iəkotalkeikei itəmah, mətəu-inu o nipəhriəniən iətəm tətətig e nikitah‡ kəni otətig itulin e nikitah.

³ Pəh Tatə Uhgīn mine Nətin Iesu Kristo okuəfinə rəhalau nəuviriən, mine nasəkəhruiniən, mine nəməlinuian kəm tah nətəm kotohtəu=pən suaru rəha nipəhriəniən mine nolkeikeiən.

Kitah okotohtəupən nəghatiən pəhriən mīn

⁴ Nīkik təmagiən asoli nian iəmeruh nenətim mīn nəuvein, kəni meruh məmə kəutaliuək e suaru rəha nipəhriəniən,§ təhmen əmə məmə inu, Tatə Uhgīn təməni kəm tah məmə kotəkeikei motol. ⁵ Kəni rəueiu əha, nəuvinik, iəu iəsəteian nəghatiən vi kəti kəm təmah, mətəu in əmə u kinotətəu rəkis e nətuəuinian.* Kəni iəkətapuəh məmə okotol əmə nolkeikeiən kəm tah mīn. ⁶ Kəni nolkeikeiən u, nipətin u noliən nəuia Uhgīn. Kəni in tətəni məmə kitah okotəkeikei motohtəu=pən suaru rəha nolkeikeiən, təhmen əmə məmə inu nəmotətəu e nətuəuinian.

* **1:1** 1Pitə 5:13 † **1:1** Jon 8:32 ‡ **1:2** Jon 14:17 § **1:4** 3Jon 1:3,4 * **1:5** 1Jon 2:7

7 Mətəu-inu nəgətun eiua mın tepət kəutan e nəhue niftəni.† İlah kəsotəhatətəiən məmə İesu in Krısto iətəm Uhgın təməni məmə otahli=pa,‡ in təmuva iətəmimi pəhriən, e nıpətın pəhriən.§* İətəmimi tol lanəha in ieiua kəni in tıkimır rəha Krısto.† 8 Tol lanəha, autətəu itəmäh məmə nəsotəmkarəpəniən e nəua uək asoli rəhatah, pəh itəmäh onəkotos nətəouiən rəfin lan.‡ 9 Nəmə iətəmi tətətu=pən aru əmə nəgətuniən kəti rəhan e nəgətuniən rəha Krısto, kəni məsəkeikeiən e nəgətuniən rəha Krısto,§ noliən rəhan tətəgətun məmə Uhgın təsatigiən e nıkin. Mətəu iətəmimi pəh iətəm tətətig əskasik e nəgətuniən rəha Krısto, in tatos Tatə Uhgın mine Nətin ilau pəti e nıkin.* 10 Nəmə iətəmi kəti tuva ohnik, kəni məsəniən nəgətuniən əhruahru rəha Krısto, nəsitien in muvən imam ikin, məsəniən “təuvır” kəm in.† 11 Mətəu-inu iətəmi tətəni “təuvır” kəm in, tətəsiru lan matol suaru o rəhan nəgətuniən təräh.‡

Naunun nəghatien

12 İatos nəghatien tepət məmə iəkətei kəm təmah, mətəu iəsolkeikeiən məmə iəkətei e nıma nauəua mine pen. Mətəu nıkik tətəhti pik məmə iəkuva

† 1:7 1Jon 4:1 ‡ 1:7 1Jon 2:22; 4:2,3 § 1:7 Jon təməni tol lanu mətəu-inu nətəmimi nətəm kəməutohtəu=pən Nostisisim, nəgətuniən rəhalah tətəni məmə İesu, rəhan nıpətın pəhriən tıka, mətəu in narmın əmə, kəni in təmos narmı iətəmimi kəti. Mətəu nıpəhriənien, nıpətın əha ikin. Nıpəhriənien, İesu Krısto in iətəmimi pəhriən, kəni in Uhgın pəhriən e nian kətiah əmə. * 1:7 Jon 1:14 † 1:7 1Jon 2:18 ‡ 1:8 1Kor 3:8; Hip 10:35,36; 11:26 § 1:9 Jon 8:31 * 1:9 1Jon 2:23 † 1:10 Rom 16:17 ‡ 1:11 1Tim 5:22

meruh itəmah kəni məghati əhruahru kəm təmah
e nəhmtitəmah, pəh nagianian rəhatah otəriaueh. §

¹³ Nenəti piām* nətəm Uhgın təmitəpin, ilah
kəutəni təuvir kəm ik.

§ **1:12** Jon 3:29 * **1:13** Pia pətan əha in niməfaki kəti min, Jon in
tətətig ikin əha. Kəni nenəti pian u, ilah nimənin rəha niməfaki əha.

Nauəuə Asim Rəha Uhg̃in Nəmtət̃iən Vi
The New Testament in the Whitesands language of
Tanna Island, Vanuatu
Niutesteman long Nərak, lanwis blong Whitesands
Tanna, Vanuatu

Copyright © 2014 Wycliffe Bible Translators, Inc.

© Wycliffe Bible Translators, Inc.

Language: Whitesands

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 22 Feb 2024 from source files dated 31 Aug 2023

913a182a-255f-5344-b6b0-0294ba221e87